

Önnur heimsókn í verkefninu „Regnbogi menninganna“ var til Lettlands í Preili Elementary School No1 og í Juventos skólann í Siauliai í Litháen. Fjórir kennarar frá Flataskóla fóru í heimsóknina í apríl 2011, en það voru þær Ragna Gunnarsdóttir og Rakel Svansdóttir kennarar í 2. bekk, Elín Ása Þorsteinsdóttir kennari í 6. bekk og Kolbrún Svala Hjaltadóttir kennslu-
ráðgjafi í tölvu- og upplýsinga-
tækni. Auk íslensku þátttak-
endanna komu þrír kennarar frá hvoru Eystrasaltslandanna Lettlandi og Litháen og einn frá Danmörku.



Allir gestirnir tóku þátt í kennslu í skólunum og kenndu Íslendingarnir nemendum að búa til páskaunga og páskadúk og glíma við gamla leiki eins og höfrungahlaup og hanaslag.



Kennarar hinna landanna kenndu einnig fönður í tengslum við páska og dans og leiki. Íslendingarnir færðu gestgjöfum sínum Jón og Gunnu í íslenskum þjóðbúningi sem nemendur höfðu búið til. Allir þátttakendur kynntu land sitt og þjóð fyrir nemendum og kennurum skólanna.



Þar sem þetta var seinni heimsóknin í verkefninu í ár var hátíð í skólanum í Lettlandi þar sem nemendur bæði frá Litháen og Lettlandi sungu og dönsuðu fyrir áheyrendur. Þá var haldin ráðstefna fyrir kennara í Litháen þar sem flutt voru erindi um samskiptaverkefni sem

heppnast höfðu vel. Íslendingarnir tóku þátt í þeirri ráðstefnu og sögðu frá eTwinningverkefni sem unnið var í Flataskóla s.l. ár.

Svona samstarf gefur alltaf eitthvað jákvætt inn í skólastarfið og er það von okkar að við eigum eftir að vera í sambandi við þessa nýju vini okkar á einhvern hátt í komandi framtíð. Það er aldrei of metið hve dýrmætt það er að fá að skoða störf og verk annarra á svipuðum vettvangi og okkar og bera saman við það sem við erum að gera og spá í það hvernig hægt er að nýta það í okkar skólastarfi.

